

De decke Erpele on de döchtege Jagghond

Von Peter Riehm

Hannes soot vör de Husdöör op sin selvsettemmert Bänksken on trock an sinne Piep, dat et mar so dämpften. Et wor Fierovend, on so stohn öm de Genuß ok tu. Över de Stroot komen en paar Jonges on sogen Hannes setten. An die Aat on Wies, wie Hannes dor soot, sogen sej well, dat hei gut opgelagg wor, on so riepen sej öm tu:

„Nou, Hannes, darf me sech bej dej setten?“

„Jo“, säht Hannes, „sett ou bej.“

Die Jonges satten sech bej on frugen gleich:

„Hannes, wie ös et vanne Johr met et Dengen in de Gaden?“

Hannes trock en Gesech on säht: „De Erpele send vanne Johr beßgut gerojen. Ek hew minne Ax nej schärpen mödden. Jeden, äver ok jeden Erpel, wor so deck, dat ek öm över krüß dörhauen mos, söß kreg ek se nit int Kelderlock herin! Minne Frau nohm de Erpeln ahn, on jedes Stöck dei sej in der Kelder op de blanke Sijjen met en Kalkquas bestricken, söß kössen mej de Erpelen fullen. Ek bedur min Frau, wie die bloß de Erpelen geschällt krigg!“

Die Jonges grienden on furggen gleich: „Wie ös et Muus in de Gaden dann gerojen? Bej son Erpelen mot et Muus doch ok well gut gerojen sin, söß paß dat jor nit beehr?“

„Ja, dat Muus, döchteg, döchteg! Hewen gej nit vanne Sommer bej mej de Möschen schilpen hören? Die Möschen hadden in de Muustöp geneß! Jonges, ek hew de Ledder ahngesatt on die Spatze-pött ütgenohmen! Ek wor die Schilperei doch leed. Dat nötzten mej all nex. Ek hew et Muus vörige Week met et „Kottiser“ (Trummsäge) afgesag. Die Sten-

gels kann ek nit verfuhren. Ek hew sej affgeschällt on die blanke Stämm bruk ek nächs Johr för Pöhl, die ek öm den Dries trecken well, dat mej de Kuh nit in ander Lüjs Dengen löp...“

Jetzt lachten die Jonges on menden: „Hannes, wat kas dou nett lügen. Dej kann me nex mehr glöven!“

„Wat seggen gej dor? Ek vertell ou garnex mehr, wenn gej mej dat nit glöven.“ Tatsächlich, Hannes sagg garnex mehr. So wollden die Gesellschafter dat äver ok nit on bädelden:

„Hannes, vertell noch wat; wej glöven dej jor alles völ tu gern.“

Hannes lagg jetz los: „Ja“, säht hei on lajden sinne Piep, „ek hew neulech en Deng beläv. Gej hev doch allemol minnen Tell gekannt? Ach joh, dat wor en Höndken! Eigentlech bruckten ek sonnen gujen Hond jor nit, mar ek hat öm mej ahngeschaff, weil ek döcker met denn Baron op Jagg geng. Grad bej sonne Jagg hät minen Tell bewesen, wat hei kos. Denn Baron hat en Has ahngeschooten. Ek met minnen Tell nor denn Anschuß! En Blut-fleck on Schnethöhr logen dor. Minnen Tell schwänzelt, nemp Spur, on fott ös hei. In en Zick-Zack geng et över et Feld, dör Gräv dör, dann löp hei op en Burenhof. Wej achter öm in. Tell stohn vör de Port on woll herin.

„Nanu“, säht denn Baron, „soll der Hase auf den Hof gelaufen sein?“ —

„Dat ös sogar sicher“, sagg ek, „minen Tell wett, wat hei düht.“

Wej mieken de Port los on Tell störm-den gleich op de Meßhoop herop! Tell gow sech in de Meß ant Graven met de Pööt. De Baron schöckeln met de Kopp. Denn Bur kom herüt on mog sech doot-

lachen, dat denn Hond bej öm in de Meß en Has süken woll. Ek liet nit nor on heßten Tell mar ömmer ahn. En paarmol nohm hei de Kopp herüt, för Luf tu schnappen, dann grabelden hei wieher. Op ehnmol dor hat hei mat gefohne, hei apportierden . . .“

„Nou segg bloß mit en Has“, saggen die Tuhörer.

„Hei apportierden en pojjeleien Piepekopp met en opgemolden Has dropp. Denn Bur lachten, denn Baron lachten on ek hew mej de Piepekopp för Andenken metgenohmen.“